

L'UNICITÂT DAL FRIÛL

Tal cuadri des Regjons e des Comunitâts Naturâls che a aderissin o no al grant moviment regjonalist da l'Europe, il Friûl al presente une cundizion e une fisiunomie nete, intierie, distinte e, si pò dî, uniche, tant in confront des Regjons talianis come di dutis chês altris.

Di chestis Regjons e Cumunitâts, une part a puedin puartâ come fundament des lôr aspirazions autonomistichis une situazion etniche che lis distache de raze e nazionalitât dominant: cussì la Scozie, la Cornovallie, la Frisie. Altris a àn ancje une lôr lenghe: i Kymris (Galles), i Bretòns, i Provençai, i Catalans, i Sudtirolois. Altris nome la situazion gjeografiche: Sicilie, Sardegna. Altris nome la storie dai secui passâts Trentin, Savoie, Palatinât e Stâts de Gjermanie. Altris ancjemò la messedance des razis: Alsazie, Vignesie Julie. Il Friûl, lis à dutis insieme e cualchidune di plui. Il Friûl al è propit bessôl.

Il Sudtirolo al è par raze, par lenghe, par civiltât, par culture un bocon di Austrie; la Val d'Aoste e sarà un bocon di France; la Corsiche un bocon d'Italie; la Baviere, un bocon di Gjermanie. Il Friûl nol è un bocon nè di Austrie, nè di Sclavanie, nè dal Venet: al è nome Friûl. Nissun dai popui che i stan ator nol fevele furlan, nissun altri nol à vût dut chel stes passât storic, nissun nol à precisamentri chel temperament.

La Provence, la Catalogne, l'Euzkadi (Pais Basc de Spagne), la Galizie a àn diferencis di lenghe e di tradizions cu la nazione che lis comande; il País dai Wales e la Bretagne francese a àn ancje diferencis di raze, ma a son secui e secui che e vivin unidis ce cu la France, ce cu la Spagne, ce cu l'Inghiltere; e cheste union, sfuarçade o sapuartade o volontarie che sedi, e je un fat che nol pò jessi trascurât e ch'al puarte lis sôs consequencis. La Furlanie e je diventade taliane part za otantetrê agns, part za trente; e je tra lis ultimis regjons vignudis a cjatâsi te situazion pulitiche di vuê e, tra chestis, e je l'uniche che no partegni a un'altre cumunitât nazionâl.

I Cjantons de Svizra a son di cuatri çocjis e di cuatri lenghis; ma gjavant i Grisons, che a son apene centmil, si trate ancje li di frazions di altris popui; dal francês, dal todesc, dal talian. Il Furlan al è un popul di bessôl, nol è une minorance alogjine, ma une piçule unitât complete, che anzit e conten minorancis di altris popui e par conseguente e à la necessitât direte di stabilî une forme juste di convivenza cun lôr.

Economicamentri e gjeograficamentri il Friûl al fâs part da l'Italie continentâl e par cheste reson al sarès di mats pensâ di sglovâlu vie des regjons talianis vicinis; ma ancje su chest pont, cu la varietât dal so teren e des sôs risorsis, cu la produzion complementâr tra montagne, culine, pianure e litorâl, une volte ch'al fos metût a sest ancje il puart di Nuiâr e sistemade un fregul miôr la situazion industriâl, la nestre Regjon e rivarès a creâ une sô configurazion economiche no autosufficient, ma scuasi complete.

Cheste cundizion specialissime dal Friûl - e i svilups che di li a puedin nassi - a Rome e je stade capide fin dal principi e simpri e je stade tignude di voli. Juste apont di cheste "regjonalitât" nete e intierie i guviars talians a àn simpri vude pôre; juste par chel a àn simpri fat di dut par inturbidile, miscliçant la int e confondint lis delimitazions e lis ideis; juste par chel il guviar di cumò al à dât un ordenament speciâl ae Sicilie o al Sudtirôl ma no al Friûl: anzit al à spesseât a glotisi chel ricognossiment prejudiziâl che la Constituent, intun moment di distrazion, si jere lassât scjampâ. Nol è di dî che Rome no si rindi cont di cheste nestre situazion cussì limpide: al è di dî che si rint cont ancje masse e che e sta in vuaite!

(Patrie dal Friûl - 1949)